

保定府志

第二十二冊 卷五十五卷五十六
仕績三 國朝

保定府志卷五十五

列傳九

仕績六 武略分見

國朝

石維崑字輿瞻大甯左衛人順治丙戌進士改庶吉士授侍御

史巡視中城時京華年少多附燾下擾民維崑悉置於法人稱

硬石御史

舊志

五年巡按陝西回叛勢甚熾維崑選將馭之事定

左遷尋復職十六年再按陝西

陝西通志

西安人爭田成訟巡撫分

左右袒前御史不能平維崑親勘其田斷以公忤巡撫意將撫

維崑事奏聞維崑減儀從却厨傳按部冰清吏畏民懷巡撫乃

感愧服後以勞成疾卒於官民來署哭者且千人祀名宦

舊志

按陝西通志石維崑清苑人
蓋清苑人而籍大甯衛者

紀耀字光甫大甯衛人順治丙戌進士授刑部主事遷郎中出爲紹興知府耀簡淡從容心細如髮教屬以廉校士惟公當越東鉅郡文書填委上牒下檄稿必數竄字無點訛緩而曲當越人爲之謠曰紀公爲政甯一清靜大事不忙小事不剩白墮三杯黃蘗一甕詳審儉約蓋實錄也歷官四川山東按察副使裁缺後補雲南巡道未赴以病卒於家

舊志

高桂字南華清苑人順治丙戌進士官兵垣給諫侃侃敷奏疏請卹忠義以激人心嚴票擬以重政本讀漢書以廣聖學皆見採納遷禮垣都諫會故輔陳名夏得罪責臺省不早論降補太僕寺主簿累遷光祿少卿膺疾告歸桂性純孝事父母以色養無私蓄得一新綺或器玩奉堂上作嬰兒摩挲狀以娛二人一兄兩弟同居雍穆人無間言居鄉十六年座無雜客官鮮竿牘

年六十二而終

舊志

按舊志高桂條下有陳寔保定左衛人順治三年以貢授睢州知州擢靖邊衛同知番弊變城不守事平罷歸茲不錄

高景字仙斗新安人父三位家居以德行稱景登順治丙戌進士受湖廣道御史出按宣大以事左遷回籍值土寇數千人乘大水以丹泊城下城素無守具幾危者再景率進士楊行健晝夜捍禦出奇兵擊賊殲其渠魁餘黨悉散起補山東鹽運司經歷累遷至通政使司進刑部尙書卒鄉居值邑大祲設賑以救饑民全活甚眾巡撫上其事

御題恩褒尙義四字賜之康熙二十一年祀鄉賢

雍正通志

崔士俊字再祁唐縣人順治丙戌進士授雲南道監察御史慨慷忠直有膽略上疏論劾謫汀州推官未幾復擢爲江南道監

察御史著有書義詩集行世

舊志

宋牧民字耑愚雄縣人順治丙戌進士授中書舍人擢戶科給事中彈劾不避權要十一年具言御史巡方首嚴察吏懲貪務期覈實併陳剔蠹之法十二年山東獻雙穗穀舉朝稱賀牧民具疏言旱蝗爲災徧及三省急勅督撫早議安輯用遏亂萌庶召天和而被休嘉者當不徒瑞穀爲然也是日同官季開生以言事干

上怒逮獄俟流徙而是疏適至

上覽之未盡卽變色令近侍傳呼牧民同官相顧驚愕謂禍不測至

內閣

上已旋宮

命閣臣詰牧民有別奏論否牧民對曰科職司言責只此憂盛危明

一心而已閣臣命北面稽首授原疏而出武闈期近因奏論武
闈朝審事宜又疏彈巡撫鑽營詞臣庸鄙銓司婪惡言詞激切
舉朝側目久之出爲河南副使分巡汝南兵備道以呈誤左遷
解組歸家居二十年康熙十八年卒年七十三

雄縣志

劉靄字潛夫高陽人性孝友順治丙戌進士任河南武陟知縣
時兵燹初平靄撫字招徠民復其業又決河水救旱全活者多
改補陝西文縣重修文廟邑乘邑有百頃里俗刁頑教化之改
名向化建靖江樓控制諸番烽烟無警民勒石傳爲劉公路遷
湖廣隨州知州除荒糧平巨寇請豁免軍需二十萬以安民巡
撫于成龍嘉其實心實政內擢禮部員外郎丙辰會試吳逆未
平滇黔試者報牒同官疑其僞不欲收靄身任之皆得與試高陽
縣遷浙江提學僉事登拔才俊得人稱極盛云卒祀鄉賢雍正通志

于嗣登字岱仙安州人崇慶子好讀書不出戶閤少以孝聞初領鄉薦以祖母疾不赴公車州長造廬敦迫見其誠懇惻然曰孝廉何減李伯令耶太息而去順治丙戌成進士授侍御史任兩月以監禮

太廟失儀罷歸里居十年用薦復官遣視兩浙鹽政清通裕餉報最掌河南道事監視吏兵二部尋遷吏部給事中轉禮部章疏皆關大計時論譴之陞光祿寺少卿累遷刑部右侍郎多所平反人號曰今之于公凡爰書有不當者輒獨一議或勸之嗣登曰此心無愧此官安足惜會更定處分光棍例嗣登又獨主一議忤

旨降二級補光祿寺卿未幾陞大理寺卿己未地震以驚悸病卒於里嗣登性醅篤克睦族黨妹有孀女與意存恤之居鄉杜門不

出與人言和悅可親衆稱長者卒之日囊無長物

舊志

康熙五十

八年祀鄉賢

雍正通志

李霽字景靄高陽人明大學士國榷子幼孤立志讀書言行不苟順治丙戌進士改庶吉士授檢討

恩詔晉編修十年

上親試習國書翰林霽與侍講胡兆龍檢討莊同生並列上等擢中允再遷侍講學士教習庶吉士時始設日講官霽與麻勒吉胡兆龍王熙曹本榮等充之十五年遷秘書院大學士尋改東閣大學士疏言內三院既改爲內閣設翰林院宜分職掌以專責成

上允所請十六年加太子太保

命校定律例十八年

聖祖御宇復設內三院爵改宏文院大學士未幾坐票擬誤鑄四級居

三月

召復其官九年仍以內三院爲內閣爵改保和殿大學士十一年纂修

世祖實錄成

賜銀幣鞍馬加太子太傅十三年

詔舉素有清操堪任繁劇者爵舉前布政使王舜年參議道俞之炎十五年再典會試十七年

詔舉博學鴻儒與大學士杜立德馮溥合疏薦副使曹溶布政使法若真參議道施閏章中書曹禾陳玉璠知縣米漢雯進士沈珩葉舒充及

召試三人皆充閱卷官所取皆名宿焉臺灣初定提督施琅請設官

鎮守廷議未決有謂宜遷其人棄其地者

上召問閣臣爵奏棄其地恐爲外夷所據遷其人慮奸宄生事應如
琅議

上黜之二十三年卒年六十爵弱冠登第入閣時年三十四老成持
重朝野倚以爲重遺疏聞

優詔賜卹謚文勤入祀鄉賢祠四十九年

諭爵孫工部主事李敏啟起擢太常寺少卿示優禮舊臣至意是歲
爵第三子其旋以教習授知縣

特旨以主事卽用晉員外郎

先正事略

爵少力學讀書寒暑不輟精於天

文嘗考驗吳明烜時憲七政二厯異同又測驗火星木星水星
躔度定其乖合銖黍不爽雖專門之學莫能加也所著有心遠

堂詩文集

讀書集

師人淑字子梅安肅人順治丙戌舉人署靜海教諭遷太學助教再遷刑部主事讞判明允會有持法不平者人淑獨上一議詔嚴詰之人爲汙下人淑覆奏詳晰考功擬褫究

上復覽前讞詞以爲然不之罪遷郎中尋陞榆林兵備道按僉榆林

古漁河上郡地番漢叢居最不易治人淑至多所興除

舊志

定鹽

茶馬政諸規申嚴市口條教闢荒三千餘里羗民憚服卒於官

安肅縣志

李順昌字燮五新安人倜儻有經世才丙戌舉於鄉歷任中部商南和順三縣令著捕寇完城績擢知濟甯州先是容城孫奇逢紀甲申京師殉難諸姓名事蹟曰表忠錄散落未輯也順昌勒成帙以授梓氏有啣之者指爲逆書逮就訊西曹難之順昌曰前人忠孝後人表章千古無禁何逆之有難者語塞釋之復

其官未幾卒

舊志

王祚明字昭仲慶都人祚盛弟順治丙戌舉人性至孝幼失怙稍長事母誠敬備至事兄恭謹讀書夜分不寐訂疑晰異字句不遺行已以邑先民月川爲法任吳橋教諭捐俸葺學宮日集諸生講明道義寒暑不輟以母憂歸服闋補固安如在吳橋時祚明性簡淡衣無二絛食不兼味卒於官貧不能殮門人賻以成禮及櫬歸士民執紼哭泣送之

舊志

石崑田字蘭產清苑人順治元年貢士授平陽府推官豁達明允獄無疑滯用薦擢荊州府同知告歸平陽多大賈素號金穴崑田能處脂不膩去之日行李蕭然家無益產居里賑饑施糶置義田善行雅量多爲人所敬服

舊志

韓逢暘號景若雄縣人前明舉人順治初除安邑令時甫經殘

破安輯有方性剛勁不畏強禦以均役清弊爲上官胥役所媒孽官七月而被誣士民呼冤事始白歸時民爭醵金爲贐婦女亦脫簪珥佐之後二載爲梓所著四書摘辨福堂卮言輦致其

家

舊志

吳臣輔號蕃之蠡縣人前明進士順治元年授國子監助教遷禮部主事陞山東提學僉事厯官湖廣陝西參議分巡鞏昌道不受吏賂清直卓著陞按察副使卒於官

舊志

韓廷對字見五高陽人少聰慧力學宗族有不能延師者招集督課成就二十餘人庚午中副榜第一癸酉再中副榜順治初由恩貢授平鄉訓導學宮頽壞捐募督修之再任高邑教諭捐金刊趙忠毅公文集築舍尊經閣旁招集邑士晨夕課業深爲學使者獎薦卒後士皆哀泣

高陽縣志

崔文學字肖游唐縣人前明舉人談事應答如流順治初任歸安知縣剖繁治劇事無留滯丙戌分校浙闈一時號稱得人尋以勞卒於官

唐縣志

馬之驪字君黃雄縣人丙子鄉試第一順治元年授山西河津令擢刑部主事歷郎中出守臨江府臨江乃其曾祖舊治也之驪撫之如家人不久卒於官貧不能殮郡人哭之慟奉木主於其曾祖祠祀之

舊志

杜應甲祁州人學問淵博以明經隱居不仕順治初屢徵乃起授山東黎城知縣多惠政年老致仕邑人建祠祀之生十子皆

有才名

祁州志

張懋勲字若樸雄縣人前明舉人順治初授湖州府司李發奸摘伏多所平反丙戌分校浙闈太宰黃機出其門己丑擢兵科

給事中尋遷河南大梁道右參議陞陝西固原兵備副使蘇松督糧道右參政所至著冰蘖聲戍戍寓江甯病卒懋勲天性孝反苦心好學暮年手不釋卷人以徐廣目之尤長於詩賦蓋得力於古者深矣

雄縣志

陳志貞字敬齋高陽人性篤厚喜讀書以明經授江南江都縣訓導陞揚州教授時侍御李直重其品望令子弟師事之課諸生先品誼而後文藝二年晉肥城令未赴卒志貞孝事孀母敬兄友弟撫諸姪睦宗族鄉閭仰之

高陽縣志

劉斗清苑人順治初教習王世子授兵部啟心郎積九載擢宗人府進國史院學士出撫甘肅上疏陳邊要肅郵政覆報墾荒田清番漢地界尋遷福建總督時海寇頻警軍興旁午斗戢兵籌餉佐成大功閩人勒石頌之斗少通

國書有譯寫傳文及

清書淳化閣帖行世康熙五十七年祀鄉賢

雍正通志

賈銳字敏士清苑人前明舉人篤實靜默有介操順治初授山東沂州知州時闖逆未靖守禦多勞事平一意撫綏革耗金罷雜役絕贖鍰與民休息擢慶陽府同知巡視茶馬御史某銳同年生也緝獲私茶欲乾沒之銳不從會番僧入貢供億擾民銳以蓄茶白撫軍移爲公用御史恚甚假他事中之罷職後起補太原以憂歸杜門謝客族人貧無家室者悉爲婚娶割已業贍之卒之日人皆流涕焉

舊志

陳效元字鳳侶唐縣人順治乙酉拔貢性強介少爲左光斗稱許邑有監司勢焰燠灼同輩約往謁效元曰折腰屈辱君等自爲之吾不與也監司致餽不顧而去

唐縣志

官陝西雒川知縣時

闖賊初平民竄山谷間效元撫循其父兄子弟與爲休息邑遂
大治會王永強倡亂逆黨持檄至雒城效元碎其檄縱使還端
坐城樓以待賊疑有備不敢犯以不阿上官罷歸韓莢陳鳳侶傳效元
明於經學義利辨甚嚴爲文雄邁著有三樂堂集學者尊爲雪
齋先生舊志子瑞舉人厚重不妄言韓莢陳鳳侶傳略

劉國英祁州人拔貢順治二年任南陽同知時有拐河土賊李
好却掠境內勢猖獗國英與知府謀陽結賊好約賊會飲乘醉
手搏之并擒其妻子南陽平德州副將馬某驕橫不法有二婦
被虜其家赴愬國英揭其奸狀馬懼出二女得其情置馬於法
資送諸虜婦歸先是助勦衛兵駐南陽民苦供應軍士誣民反
將屠之國英力爲申辨全活數萬人祁州志

劉繼昌號世培蠡縣人前明舉人順治二年授山東平度州知